

19. juni 2018

Inatsisartut suleriaasianni § 37 imm. 1 naapertorlugu Naalakkersuisunut apeqquut imaattoq matumuuna saqqummiuppara:

**Naalakkersuisunut apeqquut:**

- 1. Ilinniartut paarlaateqatigiittarnerat pillugu tapisarnermut tunngasumik Naalakkersuisut qaqugu Nalunaruusiorniarpat?**
- 2. Sunamita tunuliaqutaalluni suli Nalunaarusiortoqarsimangila?**

(Inatsisartuni ilaasortaq, Laura Táunâjik, Siumut)

**Tunngavilersuut:**

Inatsisartut ukiaanerani 2012-imi Efterskolit pillugit Inatsisartut inatsimmik allannguutaasussamik aalajangersaapput. (Inatsisartut Inatsisaat nr. 17 decemberip 3-ani 2012-imeersoq).

Inatsisartut Inatsisaat siusinnerusukkut efterskoliinnarnut atuuffeqarsimagaluartoq, inatsisissamik allannguinermi atuuffia annertusarneqalerpoq ilinniartut paarlaateqatigiittarnerannut tapiissuteqarsinnaanissamik periarfissiilluni, inatsimmilu imatut nipilerlugu aalajangersarneqarpoq: ”Nunatta Qallunaat Nunaatalu avataani ilinniariartorluni periarfissiilluni inatsimmilu imatut nipeqalerluni ”Nunatta Qallunaat Nunaatalu avataani ilinniariartorneq inuusuttunut 18-iliineqanngitsunut, tamatumani siunertaalluni inuusuttut suliamut ilisimasaat, inuttut inerisarnissaannut aammalu kulturimikkut tunulequtaatigut piginnaasaminnik siuarsaanissaq angujumallugu”. Tamatumani s.a. eqqarsaataasinnaapput AFS-ertarnerit.

Inatsisartut inatsisaanni kapitali 5-imi aalajangersakkamik nutaamik ikkussuisoqarpoq:

**§ 20a.** Naalakkersuisut Ilinniartut paarlaateqatigiittarnerannut aningaasartuutaasunut tapiissuteqarsinnaavoq. Tapiissutaasartussat Aningaasartuutissanut Inatsimmi aalajangersarneqartarput.

*Stk. 2.* Naalakkersuisut Ilinniartut paarlaateqatigiittarnerannut aningaasartuutaasartussanut tapiissuteqarnissamik malittarisassiortarpoq, tapiissutit annertussusaat, isertitatigut annertussutsit, isertitatigut killigitat pisariaqarpat aamma ilaatinneqarsinnaapput, qinnuteqarnermi maleruqqusat kiisalu maalaaruteqarnissamik iliuusissat.

§ 20a, imm. 2, malissagutsigu taava Naalakkersuisut pisussaaitaapput Ilinniartut paarlaateqatigiittarnermi aningaasatigut tapiinissamik malittarisassiussasut.

Aalajangersakkap atuutileqqaarfianiit ullumikkut ukiut tallimat sinnerlugit ingerlareersullu, Naalakkersuisut suli nalunaarusiorsimangillat ilinniartut paarlaateqatigiittarnermi aningaasatigut tapiinissamik qanoq malittarisassiortoqassanersoq.

Tamanna eqqumiiginarsinnaavoq; siullermik Naalakkersuisut pisussaaffigimmassuk, aappassaannik Naalakkersuisut decemberip qaammataanni 2012-imiilli ilinniartut paarlaateqatigiittarnermi aningaasatigut tapiinissamik malittarisassiussaq nalunaarsusiassatut missingersuut tusarniaassutigineqareemat.

Inatsisissap 2012-imi allannguuteqarnissaannut tunngaviuvoq Inatsisartuni oqaluuserineqarlunilu aalajangersaavigineqarmat (UA 2010/68), tamatumani Naalakkersuisut pisussaaffilerneqarlutik, inuusuttut amerlanerusut nunanut allanukarlutik oqaatsinik ilikkariartornissaat.

Isumaliutissiissut Kulturimut, Ilinniartitaanermut, Ilisimatusarnermut Ilageeqarnermullu ataasimiititaliamiit tunniunneqartumi, ataasimiititaliap tikkuartorpaa, Danmarkimi efterskolernissamik periarfissaareersut aammalu ilinniartut paarlaateqatigiittarnerat ilaqutariinnut pigissaarnerusunnaq periarfissaqartitsisut. Ataasimiititaliami tamanna iluarineqanngilaq tassami naalakkersuinikkut anguniagaammatt ilinniarnikkut qaffarsaaneq inunnut ataasiakkaanunnaq atuuffeqarani inuiaqatigiinnut tamanut assigiimmik atuuffeqartariaqartoq. Ataasimiititaliami tunngaviummik isuma uaniippoq, ilaqutariit ataasiakkaat aningaasaqarniarnarnerat aporfussanngitsoq inuusuttut nunanut allanut pikkorissariartorlutik ilinniariartornissaannut. Tamanna pillugu ataasimiititaliap Naalakkersuisut inappai aalajangiiffigisassatut siunnersuutip suliarineqaqqinnissaata suliarinerani ujartuiffigisagaat, sutigut periarfissaqarnersoq angajoqqaajusut aningaasatigut ukiumoortumik isertitaat najoqqutaralugit nunanut allanut ilinniariartornermi tapiissuteqarsinnaaneq. Soorlulusooq nunatsinni efterskoleriartortut tapiiffigittartut.

Inatsisip allannguutissaa 2012-imi taamatorpiaq siunertaqarluni kissaatigineqartut naapertorlugit aaqqissorniarneqarpoq.

Inatsisissami oqaasertaliussami takuneqarsinnaavoq, § 20a malillugu Naalakkersuisut peqquneqarmata ilinniartut paarlaateqatigiittarnermi aningaasatigut tapiinissamik malittarisassiornissaminnik nalunaarusioqqullugit, aamma takuneqarsinnaavoq peqqussutigineqartoq nalunaarusioqquneqartoq aalajangiussami sinaakutissat ajornannginnerusumik kukkunersiorneqartarniassammata. Ilanngullugu aamma takuneqarsinnaavoq nalunaarusiassaq inatsisissamik allanguineq iluatsillugu ataatsikkut atuutilissasoq, imatut paasillugu januarip aallaqqaataani 2013-imiit atuuffilereerlugu.

Tassalumi Naalakkersuisut peqqussutigineqartutut nalunaarusiornissaq suli naammassisimangilaat, paasinnittaaseralu malillugu nunani allani ilinniariartornermi aningaasatigut tapisarneq suli allannguuteqanngilaq, imatut paasillugu: inatsisip allannguuteqanngikkallarmat pissusiusut suli atuupput allanngortoqaranilu.

Angalaniarnermut aningaasartuutit akiliutigineqarsinnaapput, kisianni nunani allaniitilluni ilinniartutut paarlaateqatigiittarnermi aningaasartuutit allatigut tapiifigineqarsinnaanatik.

Taamaalilluni ilinniartut paarlaateqatigiittarnermi aningaasatigut tapiinissamik malittarisassat suli tassa inuusuttunut pisuunik ilaqutalinnuunnaq atuuffeqarallarpoq – tamannalu Inatsisartut 2012-imi inatsimmik allannguinermi siunertarineqartunut akerliulluinnarput.